

Bosna i Hercegovina  
Federacija Bosne i Hercegovine  
**Hercegovačko-neretvanski kanton**  
**SKUPŠTINA**  
Broj: **02-01-XII-071/21**  
Mostar, 30.04.2021. godine

**IZVOD IZ ZAPISNIKA**  
**sa dvanaeste (XII.) redovne sjednice Skupštine**  
**Hercegovačko-neretvanskog kantona**

Sjednica je održana dana 30.04.2021. godine u Sali Centra za kulturu u Mostaru sa početkom rada u 14:00 sati.

Sjednicu je otvorio Šerif Špago, predsjedavajući Skupštine Hercegovačko-neretvanskog kantona.

Budući da je sekretar Skupštine Željka Čule odsutna, predsjedavajući Skupštine HNK Šerif Špago obavio je prozivku.

**Prisutni:** Marija Bešker, Slavko Bilić, Marija Bošković, Stana Burić, Damir Džeba, Elvedin Grcić, Mejrima Hasić, Nevenko Herceg, Julineta Jurić, Tomislav Martinović, Irma Memidžan, Ivan Odak, Andrea Pehar, Milica Pehar, Amir Šelo, Šerif Špago, Alisa Hajdarović, Minela Krpo, Nermin Vrtić, Aner Žuljević, Iva Raguž, Vesna Saradžić, Selma Drljević, Đuro Prkačin, Edis Džino, Ismet Lulić i Slaven Raguž.

**Odsutni:** Ajdin Teleteović, Vera Konjevod i Zora Dujmović.

Konstatovano je da je na sjednici prisutno **27** poslanika, te da postoji kvorum za rad i punovažno odlučivanje.

**Prisutni po pozivu:** predstavnici Vlade, predstavnici međunarodnih organizacija i predstavnici sredstava javnog informisanja.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući Skupštine obavijestio je poslanike da je u materijalima dostavljen prijedlog dnevnog reda koji je utvrdio Kolegij Skupštine.

Otvorena je rasprava po prijedlogu dnevnoga reda.

Zastupnik Elvedin Grcić je u ime Kluba SDA predložio da se tačka 3. Prijedlog Programa rada Vlade HNK-a za 2021. godinu skine sa dnevnog reda 12.redovne sjednice Skupštine HNK.

Usljedila je **pauza** od 5. minuta.

Nakon pauze Šerif Špago izvjestio je zastupnike da je Klub SDA povukao prijedlog da se tačka 3. Prijedlog Programa rada Vlade HNK-a za 2021. godinu skine sa dnevnog reda današnje sjednice, te će konačan stav zauzeti u toku same rasprave.

Obavljeno je glasanje po prijedlogu Dnevnog reda 12. redovne sjednice Skupštine HNK.

Nakon glasanja konstatovano je da je većinom glasova usvojen dnevni red dvanaeste (12) redovne sjednice Skupštine HNK.

## Usvojeni Dnevni red:

1. Poslanička pitanja;
2. Izvještaj o radu Vlade HNK za 2020. godinu;
3. Prijedlog Programa rada Vlade HNK za 2021. godinu;
4. Prijedlog Odluke o kreditnom zaduženju HNK;
5. Izvještaj o izvršenju Budžeta HNK za 2020. godinu;
6. Izvještaj o izvršenju Tekuće rezerve Budžeta HNK za 2020. godinu;
7. Prijedlog Odluke o osnivanju Komisije za evropske integracije Skupštine HNK;
8. Prijedlog Odluke o osnivanju Komisije za pitanja boraca Skupštine HNK;
9. Odluka o razrješenju zamjenika kantonalnog javnog pravobranioaca u Kantonalnom javnom pravobranilaštvu HNK;
10. Inicijativa za donošenje mjera u oblasti turizma.

Jednoglasno su usvojeni i zapisnici sa 9. vanredne sjednice Skupštine HNK-a, sa 10. i 11. redovne sjednice Skupštine HNK-a.

### AD 1. Poslanička pitanja

#### Julineta Jurić:

Poštovane kolegice i kolege, sve vas zajedno pozdravljam. Imam inicijativu i zastupničko pitanje za ministarstvo financija, za ministra gospodina Adnana Faladžića. Kako je moglo uslijed kvara servera poslužitelja doći do gubitka podataka oko 6.000 proračunskih korisnika? Zašto u vrijeme današnjih tehničkih i informacijskih postignuća nije urađen takozvani „bekap“, odnosno sigurnosna kopija podataka? S kojom informatičkom tvrtkom ministarstvo financija, Vlada HNŽ-a, ima sklopljen ugovor za održavanje softvera i pružanje programske podrške? Jeli tvrtka stalno angažirana i kolika je vrijednost toga ugovora na mjesečnoj i godišnjoj razini? Hoće li oni snositi štetu zbog gubitka baze podataka, odnosno nepostojanja sigurnosne kopije? Zašto su djelatnici škola, ministarstva, sudova, uprava i drugih upravnih organizacija morali u kratkom roku za jedan radni dan unositi podatke u novu bazu podataka i hoće li biti plaćeni za taj posao za koji je inače angažirana tvrtka za programsku podršku? Jeli netko od odgovornih u ministarstvu financija odgovarao zbog propusta u radu i štete nanesene proračunskim korisnicima? Nisu isplaćene plaće vježbenicima i naknade, a ostali korisnici dobili su plaće po obračunu za mjesec veljaču koji ima najmanje radnih dana, djelatnici kasne sa uplatama rata kredita i plaćaju kazne za kašnjenja i nedozvoljene minuse. Činjenica je da već dulje vrijeme stanje u ministarstvu financija nije na zadovoljavajućoj razini, narušene su rukovodne strukture i sustavno se zaobilaze određeni rukovodni djelatnici, odnosno onemogućeno im je izvršavanje njihovih zadaća i obveza. Često dolazi do nepotrebnih kašnjenja u izvršavanju proračunskih obveza. Svi navedeni nedostaci i propusti izravna su odgovornost ministra financija. Zbog postojanja bojazni o mogućoj zlouporabi podataka proračunskih korisnika, osobnih podataka i podataka o broju računa, postavlja se pitanje razine sigurnosti, odnosno tko sve ima pristup i raspolaze sa ovim podacima? Čija je odgovornost i tko će odgovarati za posljedice i štetu nastalu eventualnim neovlaštenim upadom u sustav ministarstva financija i krađe podataka, to jest krađe novca sa računa u poslovnim bankama? Sa ovim u vezi predlažem, da Skupština HNŽ-a imenuje istražno povjerenstvo koje će prikupiti sve relevantne dokaze i činjenice o svemu navedenom i dostaviti ih Skupštini na razmatranje. Imam drugu inicijativu, ministarstvu zdravstva, rada i socijalne skrbi HNŽ-a, pravo na troškove poludnevnog ili dnevnog smještaja za osobe s invaliditetom u dnevnim centrima. Osigurati pravo na troškove poludnevnog ili dnevnog smještaja za osobe s invaliditetom, djecu i odrasle

u dnevnim centrima, i to na način da za osobe koje dolaze iz socijalno ugroženih obitelji troškove smještaja plaćaju jedinice lokalne samouprave i županija u omjeru 50%-50% troškova. S obzirom da je Skupština u lipnju 2020. godine zadužila Vlada da izradi zakon o socijalnoj skrbi, podnosim inicijativu za uvrštavanje ovog prava u zakon.

Imam zastupničko pitanje za Ministarstvo prosvjete, znanosti, kulture i športa HNŽ-a, za ministra gospodina Rašida Hadžovića. Moje zastupničko pitanje glasi: kao što nam je poznato nastavni planovi i programi su zastarjeli, zakon o osnovnom odgoju i obrazovanju donijet je 2000. godine, uključujući izmjene i dopune iz 2004., 2005., 2014., 2016., i ne sadrži ishode učenja, a što bi morali u skladu sa zakonom. Za izmjene nastavnih planova i programa potrebno je formirati radne skupine za nastavne predmete, što iziskuje znatna financijska sredstva. Kad planirate pristupiti rješavanju tog problema i osigurati sredstva za tu namjenu? Hvala.

### **Vesna Saradžić:**

Zahvaljujem predsjedavajući. I pozdravljam sve koji učestvuju u radu današnje sjednice Skupštine. Ja imam tri poslanička pitanja. Jedno pitanje za Ministarstvo trgovine, turizma i zaštite okoliša HNK-a, s obzirom na katastrofalnu situaciju na terenu po pitanju divljih deponija i činjenicu da je ovakvo stanje neodrživo, naravno ukoliko se nešto odmah ne počne poduzimati, zamolila bih odgovor na sljedeće pitanje. Šta ministarstvo poduzima na unapređenju sistema prijavljivanja nelegalnog odlaganja otpada i uspostavljanja koordinacije između građana i nadležnih inspeksijskih i pravosudnih organa? Krajnje je vrijeme da se uspostave održiva sistemska rješenja jer će u protivnom slike smeća biti dominantnije od prirodnih turističkih potencijala.

Drugo pitanje isto je vezano za ovu problematiku. Metodologija praćenja stanja okoline u smislu mjerenja treba da objedini više vrsta mjerenja, laboratorijskih nalaza i procjena utemeljenim na tim mjerenjima. Pitanje isto za Ministarstvo trgovine, turizma i zaštite okoliša HNK-a, ko je zadužen za monitoring nad radom Centra za upravljanje otpadom u Konjicu u smislu praćenja stanja okoline, zrak, tlo, voda, u skladu sa okolinskom dozvolom?

I treće pitanje. Mi smo ovdje u Skupštini HNK-a još 2016. godine usvojili nacrt zakona o Gorskoj službi spašavanja u HNK-a, od tada je prošlo 5 godina i dalje od toga nije bilo pomaka. S obzirom na značaj i potrebu djelovanja ove službe na terenu, a čemu vrlo često svjedočimo, pitanje za rukovodstvo Skupštine, kada će se na dnevnom redu Skupštine HNK-a naći prijedlog zakona o Gorskoj službi spašavanja u HNK-a, čime bi se stvorile pretpostavke za efikasniji i nesmetan rad ove nadasve humane službe? Zahvaljujem.

### **Slavko Bilić:**

Dobar dan. Pozdravljam sve nazočne. Ma ništa, evo neću striktno se nikome ovdje ni ministru prosvjete, ni ministru možda zdravstva, niti ću pismeno dostavljat, ali mislim da svi trebamo razmislit o inicijativi za ublažavanje restriktivnih mjera u obrazovanju, kao i pomjerenje policijskog sata sa 21 na 23 sata. Prvo kad kažem oko restriktivnih mjera u obrazovanju, prošle godine u kolovozu donijeli smo mjere gdje je u školskim odjelima moglo biti po 15 učenika, gdje se nije moglo izvoditi nastava tjelesnog, likovnog, glazbenog i drugih predmeta, pa su te mjere ublažavane, međutim prije mjesec dana ponovno su vraćene te mjere. Evo ja ću obrazložiti kratko. Na primjer u našim učionicama je 15-ero djece, i ta djeca ne mogu imati tjelesno, tih 15-ero djece u dvorani, a kad iziđu iz škole može ih biti na različitim sekcijama nogometnim, košarkaškim, po 30-ero djece, ima li to logike ja vas da pitam!? Isto tako kad uzmemo još uvijek djeca nemaju na primjer nastavu informatike, nastavu glazbenog, nastavu likovnog, ja bih zamolio da na kraju ove školske godine, još je ostalo za 9. razrede

samo mjesec dana, a za ostale mjesec i po, da bar zaključe djeci ocjene nastavnici na jedan normalan način. Mislim da bi tu bila mjera da u učionicama bude 20 učenika, da jednostavno i nastavnici informatike i tjelesnoga i likovnoga dođu tu.

Dalje, što smo mi uradili, mjere smo do 21 sat napravili, hajmo bit realni, ne krivim ovdje ništa policiju, ali jednostavno svijest naših ljudi, svijest građana nije dovoljna, što je prije bilo, svadbe, večere su bile od 20 sati do 2 sata po ponoći, što se sad pomjerilo, samo od 4 do 9, jeli tamo isto nazočno 300 ljudi, 200 ljudi, jesmo li išta tu uradili!? Opet kažem, sad može neko reć policija je tu odgovorna, što će radit policija, već mladi čekaju godinu i po svoju svadbu, možemo li im to osporiti, može li tamo policija ući i rastjerati to, bili to bilo grubo!? Međutim, evo smatram da se postupno stanje smiruje, da nema toliko zaraženih i da mislim da mjere možemo ublažiti. Prije svega molio bih da razmislimo u obrazovanju, da bar na jedan normalan način još jednom kažem zaključimo te ocjene. Hvala vam.

### **Ivan Odak:**

Sve vas skupa pozdravljam. Imam jednu inicijativu. Predlažem da Vlada HNŽ-a sukladno članku 37, stavak 4, Zakona o ugostiteljskoj djelatnosti, Narodne novine HNŽ-a broj 12/17, donese odluku kojom se produžuje rok za izdavanje privremenih odobrenja za rad ugostiteljskih objekata za smještaj i pružanje ugostiteljskih usluga u domaćinstvu i OPG-u ukoliko nisu ishodili uporabnu dozvolu. Predlažem da im se omogući da mogu podnijeti zahtjev i dobiti privremeno rješenje koje izdaju nadležne općinske, odnosno gradske službe, te da rok važenja ovih privremenih rješenja bude minimalno do 31.12.2024. godine. Obrazloženje. Inicijativa je već upućena u siječnju, s obzirom da dolazi turistička sezona a odgovor nismo dobili, ponovno upućujem istu. Ovakva rješenja su izdavana i ranije, uglavnom na rok od dvije godine. Smatram da ovim kategorijama pružatelja ugostiteljskih usluga treba dati mogućnost da obavljaju djelatnosti jer su ovom novonastalom covid krizom definitivno jedna od najviše ugroženih djelatnosti, kao i sve ostale koje su vezane uz turizam. Zna da su granice dugo bile zatvorene i sve ovo što se događa nitko ne zna koliko će trajati. Većina vlasnika koji se bave ovom djelatnosti u našoj županiji, Međugorje, Čitluk, Mostar, Jablanica, Konjic, Neum, Rama, nisu imali mogućnosti raditi niti su mogli ostvariti potpore zbog covida od bilo koje instance vlasti. Objekti su uglavnom zatvoreni više od godinu dana i vjerojatno još dugo neće imati posla kao prije ove situacije. Napominjem, da veliki dio njih pored članova obitelji zapošljava i druge djelatnike. Isto tako bi trebalo sugerirati, da i općinske i gradske vlasti ovim i svim ostalim kategorijama djelatnosti, koje se onemogućene u radu i pogođene ovom krizom, omoguće izdavanje privremenih rješenja bez naplate određenih taksi i nameta, kako su to do sada već radile neke općine. Smatram da je ovo minimum koji mi kao županijska vlast možemo učiniti, te očekujem da će Vlada HNŽ-a donijeti ovakvu odluku.

Danas neću postaviti nikakvo pitanje što se tiče šuma, na zadnjoj redovnoj sjednici sam postavio pitanje premijeru, dokle je stigao zakon o šumama, dobio sam kratak odgovor „usaglašavamo sa koalicionim partnerom“. Hajde više koalicioni partneri završite taj zakon o šumama nakon dugih i teških 12 godina jer dok ga vi donesete mislim da neće ostati nijedno drvo u županiji. Toliko.

**Ismet Lulić:**

Evo pozdravljam sve prisutne. Ja imam dva zastupnička pitanja. Prvo pitanje upućeno je Ministarstvu saobraćaja i veza, kao i Vladi HNK-a. Zašto Ministarstvo saobraćaja i veza HNK-a, kao i Vlada HNK-a nisu odgovorili na poziv Opštine Jablanica da se uključe u problematiku oko rekonstrukcije visećeg mosta u Ostrošcu jer znamo da je po prvobitnom planu radova na pomenutom mostu trebala da bude potpuna obustava saobraćaja od više od 20 dana? Drugo pitanje. Članom 4, stava 6, Uredbe o organizovanju službi zaštite i spašavanja HNK-a uspostavljena je služba za spašavanje sa visina koju čine 7 udruženja gorskih službi spašavanja. Članom 8 navedene uredbe propisano je da će Uprava za civilnu zaštitu i vatrogastvo u cilju stvaranja uslova da ove službe mogu obavljati poslove zaštite i spašavanja planirati odgovarajuća sredstva u budžetu kantona, kao i dio sredstava iz posebne naknade za zaštitu i spašavanje koje pripadaju kantonu prema članu 180 Zakona o zaštiti i spašavanju ljudi i materijalnih dobara od prirodnih i drugih nesreća. Ovim putem postavljam pitanje direktoru Uprave za civilnu zaštitu i vatrogastvo HNK-a, koliko je sredstava planirano u budžetima HNK-a za ovu namjenu u periodu od 01.01.2016.-31.12.2020. godine i koliki iznos iz posebne nadoknade je izdvajan za ovu svrhu u navedenom periodu, kao i koliko je novca isplaćeno ovim udruženjima u navedenom periodu? Molim da mi dostavite pismenu informaciju, sa podacima po godinama i razdvojeno po udruženjima. Toliko. Hvala.

**Selma Drljević:**

Pozdravljam sve prisutne. Ja podnosim inicijativu prema federalnom MUP-u za preuzimanje, i sprovođenje istrage i analize zadnjih huliganskih nereda u Mostaru i sam rad MUP-a HNK-a u toku istih. Jeli svjedoci smo da je sam sistem i unutrašnja kontrola MUP-a HNK-a nezakonita i nema nikakvu funkciju, zato inicijativa ide prema federalnom MUP-u da preuzmu istragu i izvrše svu analitiku i istragu po pitanju proteklih nereda koji su se desili u Mostaru u naselju Donja Mahala u cilju sprječavanja svih konstrukcija, špekulacija, dezinformacija i teorija zavjera koje se šire među stanovništvom, a to su, da su pojedini policajci redovni suport, odnosno podrška huliganima u toku jeli svih tih napada, da je ovo politički motivisan napad na naselje Donja Mahala koja je u Hagu jeli okarakterisana kao žrtva UZP-a i kao teritorija i kao civilno stanovništvo, te da je sve ovo jeli usmjereno protiv bošnjačkog stanovništva u kontekstu novih priča o razdruživanju BiH i ostalih konstrukcija koje samo usložnjavaju i otežavaju svu sigurnosnu situaciju u HNK-a, a posebno u Mostaru. Zato iz gore navedenih razloga jeli ovu inicijativu podnosim i šaljem prema federalnom MUP-u, da bi suzbili sve te manipulacije po pitanju svog sigurnosnog stanja u HNK-a i posebno u gradu Mostaru.

**Marija Bešker:**

Dobar dan. Sve vas skupa pozdravljam. Moje zastupničko pitanje danas ide prema Ministarstvu zdravstva, rada i socijalne skrbi. Dakle, u izvješću o radu Vlade koje je pred nama vidljivo je da su odlukom Vlade, a u svrhu izmirenja dodatnih troškova zbog COVIDA-19, određenim domovima zdravlja odobrena sredstva u ukupnom iznosu od 300.000 KM. Naime, poznato je da su sve zdravstvene ustanove, ponajviše SKB-a Mostar, imale značajno povećanje troškova opreme, lijekova, pa i povećanu potrebu za medicinskim i nemedicinskim djelatnicima. U manjoj mjeri se to događalo i u domovima zdravlja, ovisno o broju stanovnika, području koje pokriva i udaljenosti od bolnice. Ako se odlučilo pomoći ovim ustanovama, onda je trebalo to uraditi prema određenim kriterijima na osnovu poznatih parametara. Svima je poznato da su sredstva Zavoda zdravstvenog osiguranja redovna, pa i nakon takozvanog rebalansa redovno raspoređuju po određenim kriterijima, isto tako sredstva po odluci Vlade i Skupštine HNŽ-a za pomoć primarnoj zdravstvenoj zaštiti. Zašto se ovaj put odstupilo od ovog

pravila? Naravno da postavljam ovo pitanje jer je Dom zdravlja Rama izostavljen s ovog popisa, a svi troškovi, od lijekova, laboratorija, medija za testove, dežurstava, pripravnosti, kućnog liječenja, transporta pacijenata do doma zdravlja, bolnice, i od bolnice, su značajna porasli. Uz to porasli su i troškovi održavanja voznog parka, opreme, a i grijanja, u ovu ustanovu još nije došlo na red znači utopljanje iako je ovo najsjevernije smješšana zdravstvena ustanova u našoj županiji. Iako ne očekujem promjene učinjenog očekujem odgovor na to pitanje i jednako postupanje prema svim zdravstvenim ustanovama u narednom periodu. Hvala.

### **Amir Šelo:**

Pozdravljam uvažene kolege i kolegice, članove Vlade. Ja bi prvo kao zastupnik želio osudit onaj napad koji se desio prošli vikend na naselje Donja Mahala i mislim da je to danas i Skupština HNK-a ovdje trebala da uradi i da pošaljemo poruku da onakvi napadi nisu i ne smiju da se dese u 21. stoljeću u jednoj sredini kakva je Mostar. Drugo, želio bi čestitati danas navijačima Veleža koji su kupili preko 8.000 karata.

Ja imam jednu poslaničku inicijativu i jedno zastupničko pitanje. Prvo podnosim zastupničku inicijativu Vladi HNK-a i Ministarstvu privrede, a odnosi se na formiranje lota 4 u Programu utroška sredstva Ministarstva privrede sa pozicije subvencije privatnim preduzećima za 2021. godinu. Znači pozivamo vas da u Programu utroška sredstava Ministarstva privrede sa pozicije subvencije privatnim preduzećima za 2021. godinu formirate lot 4 koji bi se zvao poticaj razvoju startap mladih u ukupnom iznosu od 150.000 KM. Namjena navedenih sredstava bila bi subvencioniranje troškova registracije djelatnosti, subvencioniranje bruto plaće, subvencioniranje dijela troškova uređenja i opremanja poslovnog prostora, subvencioniranje dijela troškova nabave opreme, mašina, alata i repromaterijala i subvencioniranje usavršavanja radnika unutar registrovane djelatnosti. Korisnici ovog lota bile mi mlade osobe do 35 godina, koje imaju 35 godina ili manje godina na dan raspisivanja javnog poziva i koje znači uz podršku ovih poticajnih sredstava žele da registruju privredni subjekt novi startap i postojeći privredni subjekt čiji su osnivači mlade osobe do 35 godina, to su dakle postojeći startapovi. Kao što znamo u budžetu HNK-a za 2021. imamo tamo onu budžetsku poziciju subvencije privatnim preduzećima i mislim da imamo prostora da jedan lot onaj posebno izdvojimo da to bude lot za mlade. Ja sam ovdje pripremio i neka onaj opšta pravila koja bi se možda mogla razmotriti, ali evo da to sada trenutno ne čitam, pa ću ja ostavit ovo rukovodstvu Skupštine da proslijedi Vladi i ministarstvu na dalje postupanje.

Drugo tiče se znači ovih napada na Donju Mahalu, ja u tome dijelu postavljam poslaničko pitanje Ministarstvu unutrašnjih poslova. „Poštovani, molimo vas da nam dostavite izvještaj o dešavanjima sa 24.04. na 25.04. u subotu u gradu Mostaru, koji će obavezno sadržavat sljedeće informacije: koliko je policajaca iz Policijske uprave Mostar bilo raspoređeno po gradu Mostaru u noći sa 24.04. na 25.04. u provođenju mjere zabrane kretanja iza 21 sat, dali su sve kamere koje pokrivaju grad Mostar bile u potpunosti funkcionalne, kako je moguće da Operativni centar nije obaviješten o kretanju organizovane grupe od 50 i više lica prema naselju Donja Mahala iako su ta lica bila naoružana različitim tupim predmetima i bogzna sa čim još, zašto je Policijska uprava Mostar reagovala tek onda kad su se građani sami oragnizovali u obrani svojih porodica i domova od napada ovih lica, dali su poznata imena svih lica koja su izvršila napad na Donju Mahalu i dali se Tužilaštvo HNK-a odmah uključilo u rasvjetljavanje ovoga napada kao i u nedavnom slučaju dvojice policajaca, zašto je ovaj napad okarakterisan samo kao narušavanje javnog reda i mira i zašto ljudima koji su u nužnoj obrani, ponavljam nužnoj obrani, branili svoje porodice i svoju imovinu u Donjoj Mahali od napadača, sada dolaze prekršajni nalozi za kršenje mjera zabrane kretanja kad se zna da je policija zakazala u sprječavanju ovoga napada, i dali ćete izvještaj o napadu na Donju Mahalu sa inkriminacijom krivičnih djela dostavit na postupanje Tužilaštvu HNK-a?

**Sladan Bevanda, ministar MUP-a HNK-a:**

Zahvaljujem. Samo ću kratko odgovoriti. Sve vas pozdravljam. Uvaženi zastupnik Šelo će dobit pisani odgovor znači i na ovo pitanje i na događaj premlaćivanja mladića od 10. travnja znači u naselju Balinovac od strane policijskih službenika, ali svakako i o događaju od sinoć, paljenju baklji i remećenju javnog reda i mira noći u 3 i 30 ispred Hotela City u gradu Mostaru gdje su spavali nogometaši Borca. Dakle, pa čak i o tome tko je u policiji sinoć taj slučaj zataškao, tko ga nije unio u bilten dnevnih događanja i zbog čega se to desilo. Znači istražiti ćemo i ovoga počinitelje toga događaja, a svakako ćemo istražiti i unutar policije ovoga propuste. Hvala lijepa.

**Milica Pehar:**

Zahvaljujem gospodine predsjedavajući. I lijep pozdrav svima. Evo mislim da već moje prethodne kolege su nešto govorile o ovim događajima, pa bi moje pitanje bilo nešto u tom smislu za ministra unutarnjih poslova. Što je Ministarstvo unutarnjih poslova poduzelo u svezi posljednja dva slučaja koja su uznemirila javnost, prvi slučaj postupanje policajaca prema mladiću koji nije poštovao policijski sat i drugi slučaj u svezi izgreda navijačkih skupina. Obrazloženje. Upravo zbog ovih različitih informacija koje stalno kruže u javnosti i izazivaju uznemirenost mislim da je ministar prava osoba koja bi nam to mogla ovdje u ovom domu pojasniti, da nam je svima jasno o čemu je riječ i zanima me onaj dio što će biti sa policajcima koji su zlouporabili ovlasti koje kao policajci imaju. Hvala.

**Slaven Raguz:**

Poštovani zastupnici, gospodine predsjedniče, gospodine zamjeniče, sve vas najsrdačnije pozdravljam. Ja imam dva zastupnička pitanja i dvije inicijative. Zastupničko pitanje prvo ide gospodinu Niki Marušiću ravnatelju Fonda za okoliš HNŽ-a, koje su udruge, pojedinci i medijske kuće i na osnovu kojih kriterija u 2020. i 2021. dobivali financijska sredstva Fonda za okoliš? Molim da mi se isti dostave u opisu zajedno sa iznosima i namjenama. Drugo pitanje, gospodinu Radi Bošnjaku, v.d. ravnatelju ZZO-a, koji je iznos sredstava utrošen za kupovinu i opremanje zgrade, ureda ili zgrade Zavoda za zdravstveno osiguranje u Rami? Budući da sam postavio prošli put usmeno pitanje, nisam dobio odgovor, sad ga šaljem u pismenoj formi.

Dvije zastupničke inicijative. Prva ide prema Vladi HNŽ-a, za utvrđivanje ženama-majkama naknada na plaću za polovinu vremena koje ne rade, sukladno zakonom o radu, članak 63 i članak 64. Dakle, sukladno članku 63 i 64 zakona o radu, ženama s djetetom najmanje do jedne godine života, za blizance, treće i svako sljedeće dijete do navršene dvije godine života je omogućeno raditi polovinu punog radnog vremena. Nedavno sam dobio informaciju da ova mjera, dakle imaju ove žene naknadu na plaću na period dnevnog rada koje su u vidu naknada njima isplaćene, primjerice u ZHŽ-u na puni iznos plaće, u kantonu Sarajevo na iznos od 30% do punog iznosa plaće, a u nas ova naknada ne postoji. Tražim da Vlada HNŽ-a definiira način, dali putem izmjena i dopuna zakona o zaštiti obitelji s djecom ili nekim drugim uredbama, na osnovu čega će se ženama-majkama omogućiti primanje naknade na plaću za polovinu vremena koje ne radi i to u iznosu od 50% iznosa plaće. Mislim ako je to moguće u drugim županijama koje imaju daleko manji proračun od naše, trebalo bi naći neko rješenje, mislim da nisu to neka velika sredstva, da se ženama-majkama omogući, i očevima, članak 63, stavak 2, zakona o radu, ako žena mora raditi puno radno vrijeme a ostvaruje ova prava onda i otac može primiti ovu naknadu. Mislim ako može ZHŽ-e ovo imati zašto ne bi HNŽ-e također imao.

Druga zastupnička inicijativa ide ministarstvu unutarnjih poslova, gospodinu Slađanu Bevandi, to je postavljanje radara za kontrolu brzine na magistralnoj cesti M17, točka 4, u naselju Sretnice. Samo u proteklih 4 mjeseca ove godine na spomenutoj prometnici zbog neprimjerene

brzine dogodilo se više prometnih nezgoda, a neke i s težim ozljedama sudionika u prometu. Ranije na istom mjestu je bilo više prometnih nezgoda sa smrtnim slučajevima i sa teškim ozljedama, ljudi su ostali teški invalidi vezani za krevet, nepokretni, neki su trajno invalidi, oduzeti od pasa prema gore. Predlažem da se stavi radar za kontrolu brzine kao jedan vid prevencije svih budućih prometnih nezgoda, dolaze toplija vremena, izlaze motociklisti, izlaze biciklisti, tamo se vozi brže, puno brže nego dopušteno. Smatram da bi ovo trebalo u što prijem roku odraditi.

E sad samo ću iskoristiti, da se ne javljam ponovo, za par konstatacija. Dakle, prošli put na zadnjoj redovitoj sjednici sam postavio pitanje.

Pitanje sam postavio o utrošku sredstava za medije po odluci Ureda predsjednika Vlade, nisam dobio odgovor, pa ponavljam, u proceduri je tamo, pa ponavljam ponovo pitanje. Ako ne dobijem do sljedeće sjednice tražit ću stavljanje na točku dnevnog reda.

Dalje, vezano za inicijativu gospodina Bilića, u potpunosti podržavam njegovu inicijativu i ja sam 16.01. poslao u pisanoj formi inicijativu prema ministarstvu obrazovanja, nisam dobio valjan odgovor, sve stoji, da ne ponavljam šta je gospodin Bilić rekao, samo podržavam u potpunosti ovo što je rekao. Dakle, i znanstveno je dokazano da djeca apsolutno ne pate od koronavirusa kao odrasli, dakle nema niti jedan teški slučaj, niti jedan nije primljen u bolnici, niti pogotovo nema smrtnih slučajeva, djeci se mora omogućiti normalno obrazovanje.

Evo samo još jedan, 16.01. sam tražio posebnu točku dnevnog reda po pitanju informacije o stanju sustava zdravstva i zdravstvene zaštite u HNŽ-u, evo ovdje odluke od 26.01., sad ulazimo u 5. mjesec, mi smo dobili paušalan odgovor od strane ministarstva zdravstva, i po pitanju ovoga sustava zdravstva i zdravstvene zaštite u HNŽ-u i postupku pregovora sa sindikatima zdravstvenih radnika. Danas je 5. mjesec, ovo je zaključak Skupštine iz 26.01., dakle u 4 mjeseca, zar je moguće da u 4 mjeseca mi nismo u stanju dobiti valjan odgovor po ove dvije teme, unatoč zaključku Skupštine!? Mislim da je to nepoštivanje ovoga tijela, a kad bi možda malo krenuo dublje analizirati možda i kršenje nekih zakona. Zahvaljujem.

### **Rašid Hadžović, ministar obrazovanja, nauke, kulture i sporta:**

Naravno. Želim sve da vas pozdravim. Samo kratko da odgovorim. Drago mi je da ste primijetili da su škole bile sigurna mjesta za naše učenike, upravo iz razloga što su mjere koje smo mi dogovorili na početku školske godine bile uspješno postavljene i iz tog razloga imamo uspješno odrađenu školsku godinu, u čitavoj ovoj godini u našem kantonu djeca su bila u školama. Ni jedna druga, ni kanton, znači u državi, ni jedan dio BiH nije imao od početka do kraja u skladu sa kalendarom odrađenu školsku godinu u školama. Znači ja kao ministar izuzetno sam ponosan na to i svi ljudi koji su učestvovali, od direktora, nastavnika, djece i roditelja.

Vezano za popuštanje mjera, da, mi smo uvijek tražili to i u dogovoru sa kriznim štabom smo dogovarali, naše je vezano za obrazovanje i naša je želja bila uvijek da mjere popuštamo kao obrazovni radnici, ali ipak je ovo zdravstvena kriza i mjerodavni su ljudi iz zdravstva i oni donose mjere i mi ćemo ih poštovati dok god budu ih oni donosili. Hvala.

**Aner Žuljević:**

Zahvaljujem predsjedniče. Pošto se prvi put javljam, da pozdravim sve, i u ovoj prvoj sali i u onoj drugoj sali. Samo mi nije jasno, mi smo se ovdje odvojili svi, a vladu smo strpali na 20 centimetara jedne od drugih, pa mi nisu jasne ove epidemiološke mjere u konzistentnosti!? Izgleda da imaju kolektivni imunitet. (napomena-rečeno kroz malu šalu)

Pa ne znam šta je odnos, mislim nekonzistentni smo u toj priči, ako ćemo samo štitit jedne. Imam inicijativu da Vladu HNK-a nazivamo u skupštinu u skladu sa onim realnim i objektivnim stanjem grupe ljudi koji su zarobljeni na poziciji ministara nakon što im je istekao mandat. To je otprilike objektivno stanje koje mi imamo.

I drugo pitanje, prema ministarstvu pravde, dali je istina da nadležne institucije ne izriču sankcije zbog nasilja u porodici jer nema planiranog novca u budžetu? Zahvaljujem.

**Damir Džeba:**

Poštovani predsjedniče, potpredsjedniče, ministri u Vladi, premijeru, kolege i kolegice zastupnici. Zastupničko pitanje za ministarstvo financija i ministra gospodina Faladžića. Poštovani, sukladno Poslovniku o radu naše Skupštine postavljam zastupničko pitanje, tražim pisani odgovor na razloge takozvanog pada servera u ministarstvu financija vezano za isplatu plaća korisnika proračuna HNŽ-a. Naime, vrlo skupo plaćamo usluge koje nismo dobili. 24.02.2021. ministar je potpisao plan javnih nabava za 2021. godinu i to: pod 1) usluge održavanja informatičkog sustava financijskog upravljanja od 80.000 KM, i pod 2) usluge funkcionalne podrške od 20.000 KM, da bi za samo kratko vrijeme bila dovedena u pitanje sigurnost poslovanja, ali i osobnih podataka, to smo čuli od kolegice Jurić maloprije. Pitanje je također koju su bili kriteriji i na koji način je izabrana tvrtka za financijsko upravljanje i funkcionalnu podršku, kada ista nije ispunila ugovoreno? Kako je ministarstvo zaštitilo naše javne financije, ali i osobne podatke u potpisanom ugovoru? Imamo još jedan dodatni problem jer su plaće isplaćene za veljaču, neko je zaradio, neko je nije zaradio, onaj koji nije zaradio morat će je vraćat, dolazimo ponovo do tehničkog pitanja, pa evo da vidimo kako izići iz svega ovoga. I evo ako može, za ministra obrazovanja, prošli put sam ja ovdje govorio da jedna od pogođenih mjera koje odgovaraju realnosti terena jer sve institucije i organizacije se bore sa ovom krizom na svoj način, operativni timovi su izvrsna stvar, pa je bio primjer što bi mi zatvarali školu u Rami ako nema ni jednog zaraženog, a naravno da trebamo zatvorit recimo neku školu evo u Mostaru koja ima jako puno zaraženih i zato je dobra bila mjera da operativni timovi u svojoj autonomnosti odlučivanja kažu koji način, odnosno model A nastave se izvodi, da odlučuju o modelu nastave, a onda iza toga poslije skupštine imali smo svašta nešto, naravno pritisnuti i većom zaraženošću i opasnošću, međutim imam osjećaj da smo dobrim dijelom, ružno ću reć, izludili roditelje, nastavnike, ravnatelje, zbornicu, a u potpunosti ne znam koliko smo obratili pozornost koliko sve ovo ima utjecaj na djecu. Pa evo ministre kratko možda jer svi su komentirali jeli 15 plus, jeli 18 plus, roditelji su nam dovodili djecu u školu, ostavljali ispred škola, mislim da je aktualni problem, neću pisano, ako možete kratko usmeno, uz evo zadovoljstvo jedno vezano da će se školska godina koliko toliko primjereno završiti. Hvala.

**Rašid Hadžović, ministar obrazovanja, nauke, kulture i sporta:**

Zahvaljujem na tom pitanju jer dosta je možda nekih stvari i nedoumica naš prijedlog donio. Znači mi sa federalnog nivoa imamo određene naredbe i nama se, odnosno kriznim štabovima i vladi dozvoljava samo donošenje restriktivnih mjera. Mi smo isto na taj način pristupili i operativnim timovima da odaberu postojeće modele koji su dogovoreni bili na početku školske godine, 15 plus, 7-7 ili 3-2. 15 plus model je bilo 15 učenika u razredu, a da se višak ovaj učenika rotira, 7-7 model je bilo da 7 dana budu u školi, a 7 dana da budu u dvije grupe, podijeljene 7 dana da budu online, i 3-2 model, znači neke škole su usvojile sistem da jedan dan bude jedna grupa, drugi dan druga grupa. Poslije toga smo insistirali kada je došlo do

smanjenja broja zaraženih da idemo na 18 plus, kao jedan pedagoški minimum i većina je onda, možda nekih 90-ak posto svih naših škola je sa tim modelom bilo u jednom hajde da kažemo maksimalnom broju učenika u svakoj školi. Također smo pored toga bez obzira na broj učenika vratili razrednu nastavu, tako da su sva djeca u razrednoj nastavi bila u punom kapacitetu. Nažalost, povećanjem broja zaraženih desilo se upravo ovo. Mi smo operativnim timovima dozvolili da mogu zatvoriti školu, da prebace na online, ali da se drže ovih postojećih prvobitnih mjera koje su bile dogovorene na početku školske godine, odnosno trenutno je sad da mogu da biraju između ova tri modela, 3-2, 7-7 ili 15 plus. Ja se nadam da ćemo u što skorije vrijeme opet vratiti 18 plus i nadam se da ćemo na taj način i završiti školsku godinu. Evo to je, da ne bude ono nekih nedoumica, jer to je jednostavno cilj da se djeca i zaposlenici sačuvaju, prvo zdravlje, pa onda sve ostalo. Evo takav je stav od početka. Hvala.

### **Minela Krpo:**

Pozdravljam sve prisutne. Danas imam zastupničko pitanje i jednu inicijativu. Podnosim inicijativu da se policajcima nabave kamere, to jest mini kamere koje bi policajci nosili na svojim uniformama. Obrazloženje. Obzirom na nedavni događaj napada huligana na domove i živote građana Donje Mahale, te slučaj premlaćivanja momka od strane dvojice policajaca, podnosim inicijativu da se policajcima nabave kamere, što je jedan pozitivan primjer iz kantona Sarajevo. Usvajanjem ove inicijative javnost i nadležne institucije bi imale adekvatan uvid u rad policije, kao i druge benefite koje ova inicijativa donosi. Zastupničko pitanje. Tražim od Vlada HNK-a da mi dostavi odluku o dokapitalizaciji Hotela „Stella“ u Neumu. Tražim da mi Vlada HNK-a dostavi vlasničku strukturu Hotela „Stella“.

### **AD 2. Izvještaj o radu Vlade HNK za 2020. godinu**

Obrazloženje je dao Nevenko Herceg, predsjednik Vlade HNK.

Otvorena je rasprava.

U raspravi su učestvovali: Aner Žuljević, Slaven Raguž, Amir Šelo, Nevenko Herceg, Vesna Saradžić, Ivan Odak, Đuro Prkačin, Stana Burić, Tomislav Martinović i Šerif Špago.

Obavljeno je glasanje o Izvještaju o radu Vlade HNK za 2020. godinu.

Većinom glasova „Za“, uz 3 glasa „Protiv“, usvojen je Izvještaj o radu Vlade HNK za 2020. godinu.

### **AD 3. Prijedlog Programa rada Vlade HNK za 2021. godinu**

Obrazloženje je dao Nevenko Herceg, predsjednik Vlade HNK.

Otvorena je rasprava.

U raspravi su učestvovali: Julineta Jurić, Amir Šelo, Slađan Bevanda, ministar unutarnjih poslova HNK, Stana Burić, Slavko Bilić, Đuro Prkačin, Ivan Odak, Tomislav Martinović, Damir Džeba i Elvedin Gtčić.

Usljedila je **pauza** od 20 minuta.

Nakon pauze obavljeno je glasanje po tački 3. Prijedlog Programa rada Vlade HNK za 2021. godinu.

Nakon glasanja konstatovano je da je većinom glasova „Za“ usvojen Prijedlog Programa rada Vlade HNK za 2021. godinu.

Obavljeno je glasanje po prijedlogu Zaključaka zastupnika: Julinete Jurić, Damira Džebe i Stane Burić.

Zaključak zastupnice Julinete Jurić:

**„Skupština zadužuje Vladu i Ministarstvo prosvjete, znanosti, kulture i športa da u sklopu Programa rada za 2021. pripremi i zakone: Zakon o osnovnom i srednjem odgoju i obrazovanju HNŽ-a, Program i Zakon predškolskog odgoja i obrazovanja, Zakon o izdavačkoj djelatnosti i Zakon o udžbenicima“.**

Obavljeno je glasanje o navedenom prijedlogu zaključka.

Nakon glasanja konstatovano je da je većinom glasova „Za“ usvojen navedeni Zaključak.

Zaključak zastupnika Damira Džebe:

**„Zadužuje se Uprava za Civilnu zaštitu i vatrogastvo HNŽ-a da u svoj Program rada normativna djelatnost uvrsti i predlaganje nacрта i prijedloga zakona o zaštiti i spašavanju ljudi i materijalnih dobara od prirodnih i drugih nesreća u HNŽ u 2021. godini, u trećem kvartalu“.**

Obavljeno je glasanje o navedenom prijedlogu zaključka.

Nakon glasanja konstatovano je da je većinom glasova „Za“ usvojen navedeni Zaključak.

Zaključak zastupnice Stane Burić:

**„Zadužuju se ministarstva u Vladi HNK-a da izvrše analizu postojećih podzakonskih akata i da ih prilagode u cilju jednostavnijeg ishოდovanja neophodne dokumentacije za investiranje“.**

Obavljeno je glasanje o navedenom prijedlogu zaključka.

Nakon glasanja konstatovano je da je većinom glasova „Za“ usvojen navedeni Zaključak.

#### **AD 4. Prijedlog Odluke o kreditnom zaduženju HNK**

Obrazloženje je dao Adnan Faladžić, ministar finansija u Vladi HNK.

Otvorena je rasprava.

U raspravi su učestvovali: Stana Burić i Šerif Špago.

Stana Burić predložila je slijedeći Zaključak:

**„Traži se od Kantonalnog suda dostavi izvještaj o dosadašnjim ulaganjima u rekonstrukciju objekta Kantonalnog suda u roku od 30 dana“.**

Obavljeno je glasanje po navedenom prijedlogu Zaključka.

Nakon glasanja konstatovano je da je navedeni Zaključak zastupnice Stane Burić jednoglasno usvojen.

Obavljeno je glasanje po Prijedlogu Odluke o kreditnom zaduženju HNK.

Većinom glasova „Za“, uz 2 glasa „Protiv“, usvojen je Prijedlog Odluke o kreditnom zaduženju HNK.

**AD 5. Izvještaj o izvršenju Budžeta HNK za 2020. godinu**

Obrazloženje je dao Adnan Faladžić, ministar finansija u Vladi HNK.

Otvorena je rasprava.

U raspravi su učestvovali: Ivan Odak i ministar Faladžić.

Obavljeno je glasanje o Izvještaju o izvršenju Budžeta HNK za 2020. godinu.

Većinom glasova „Za“, uz 2 glasa „Protiv“, usvojena je Odluka o Izvještaju o izvršenju Budžeta HNK za 2020. godinu, uz suglasnost da se u Izvještaju isprave tehničke greške u sintetičkom dijelu dokumenta na str. 5, i da stoji „Transfer šumsko gosp. privrednim društvima“.

**AD 6. Izvještaj o izvršenju Tekuće rezerve Budžeta HNK za 2020. godinu**

Obrazloženje je dao Adnan Faladžić, ministar finansija u Vladi HNK.

Otvorena je rasprava.

U raspravi nije nitko učestvovao.

Obavljeno je glasanje o Izvještaju o izvršenju Tekuće rezerve Budžeta HNK za 2020. godinu.

Nakon glasanja konstatovano je da je Izvještaj o izvršenju Tekuće rezerve Budžeta HNK za 2020. godinu jednoglasno usvojen.

**AD 7. Prijedlog Odluke o osnivanju Komisije za evropske integracije Skupštine HNK**

Obrazloženje je dao Šerif Špago, predsjedavajući Skupštine HNK.

Otvorena je rasprava.

U raspravi nije nitko učestvovao.

Obavljeno je glasanje o navedenom Prijedlogu.

Nakon glasanja konstatovano je da je Prijedlog Odluke o osnivanju Komisije za evropske integracije Skupštine HNK jednoglasno usvojen.

**AD 8. Prijedlog Odluke o osnivanju Komisije za pitanja boraca Skupštine HNK**

Obrazloženje je dao Šerif Špago, predsjedavajući Skupštine HNK.

Otvorena je rasprava.

U raspravi nije nitko učestvovao.

Obavljeno je glasanje o navedenom Prijedlogu.

Nakon glasanja konstatovano je da je Prijedlog Odluke o osnivanju Komisije za pitanja boraca Skupštine HNK jednoglasno usvojen.

**AD 9. Odluka o razrješenju zamjenika kantonalnog javnog pravobranioca u Kantonalnom javnom pravobranilaštvu HNK**

Obrazloženje je dao Šerif Špago, predsjedavajući Skupštine HNK.

Otvorena je rasprava.

U raspravi nije nitko učestvovao.

Obavljeno je glasanje o navedenoj Odluci.

Nakon glasanja konstatovano je da je Odluka o razrješenju zamjenika kantonalnog javnog pravobranioca u Kantonalnom javnom pravobranilaštvu HNK jednoglasno usvojena.

#### **AD 10. Inicijativa za donošenje mjera u oblasti turizma**

Obrazloženje je dao Tomislav Martinović, zamjenik predsjedavajućeg Skupštine HNK.

Otvorena je rasprava.

U raspravi su učestvovali: Stana Burić, Ivan Odak, Šerif Špago i Tomislav Martinović.

Predložen je slijedeći Zaključak:

- 1) Skupština HNK-a traži od Vijeća ministara BiH da donese hitne korekcije vezane za ulazak stranih državljana u BiH na osnovu potvrde o negativnom PCR testu ili negativnom antigenskom testu, potvrdu o preboljeloj infekciji Covid-19 ili potvrdu o obavljenom cijepljenju protiv Covid-19.
- 2) Skupština HNK-a traži od općinskih, gradskih, kantonalnih vlasti, federalne Vlade i kantonalnog i federalnog ministarstva turizma preusmjeravanje dijela sredstava za sufinansiranje antigenskog testiranja za turiste koji su boravili u BiH pri povratku u njihove domicilne države.
- 3) Skupština HNK-a od javnih zdravstvenih ustanova u HNK-a traži preispitivanje i smanjivanje cijena testiranja i izjednačavanje cijene testa za strance i državljane BiH.
- 4) Od javnih zdravstvenih ustanova (domovi zdravlja) tražimo organiziranje testiranja na mobilnim punktovima na lokacijama gdje je koncentriran najveći broj turista, a sve u cilju pristupačnije i brže usluge.
- 5) Tražimo od Vlade HNK-a i nadležnog ministarstva da u roku od 30 dostavi izvještaj o radu Turističke zajednice HNK-a i prijedlog mjera za poboljšanje rada u tom segmentu.
- 6) Zadužuje se Vlada i nadležno ministarstvo da produži rok važenja privremeno izdatih rješenja za obavljanje turističke djelatnosti koju obavljaju privatni iznajmljivača na rok do 31.12.2021.godine.

Obavljeno je glasanje o navedenim prijedlozima Zaključaka.

Nakon glasanja konstatovano je da su navedeni zaključci jednoglasno usvojeni.

Sjednica je završena u 18:30 sati.

Zapisničar  
Dario Topić

Predsjedavajući  
Šerif Špago